



泊翁集

春

~18
2451
1



4m
2740
7-4

2451

帶琴樓編

泊翁集詩鈔

己未印行

泊翁集序



詩至于怪而其變極矣然不怪亦不足以爲詩古之詩亦多怪者而今人不怪其怪獨怪今人之怪豈寬古而苛今歟殆今人少可而多所怪耳夫木之瘦石之暈棲冰之蠶食火之鼠山林五采之鳥海中千尋屈曲之珊瑚與夫宇宙間珍異駭惑而不可名狀者皆物之怪而世顧寶之惟詩則不然噫怪矣今以三百篇稱詩者可以無譏而若只取關關雎鳩采采芣苢則二南之害澣害不舒而脫脫已屬於怪而雨無正十月之交當被宣尼之刪豈不舛乎蓋日新者景而生生有限易感者情

而續續不窮苟使石上流泉松下清風章比而句排篇
複而字架撈落月於水中索枯花於鏡裏腐香虛色厭
厭無神氣則亦復何樂哉余友書娛生所謂今詩之怪
者也其爲詩取材新造語奇用意奧攻字苦薄三光而
窮九泉搜神遠而破鬼膽要以不經人道爲工故其古
如空青縈鼎其靈如水銀轉瓶其突兀如峯飛來其空
幻如塔見成而惟其具慧性而賦恨最深故有春鳥之
血有秋猿之淚其悄然蕭瑟淒怨入骨則又髣髴乎秋
山幽寂哀鬼啾啾也嗟乎是宜見怪於今人而或指爲
不祥之物競起而噪之則亦安能知其可寶乎余不見

書娛久矣今夜偶從敗簾中檢得舊詩篝燈疾讀如聞
言笑如見鬚眉離星缺月靈飈驟雨隱現發作于行墨
之間慨然歎噫之餘輒類次而題之如此未知書娛近
日之怪復如何庚戌中元夜鹿隱洪就榮書于南齋直
廬

世稱詩人多窮詩豈能窮人哉蓋以其窮而後工耳李君晚用以其先人泊翁遺稿屬余序泊翁雨念子也雨念以文章鳴於世而泊翁繼之噫天生俊才又何以窮之哉泊翁平生冤苦幽鬱悲憤之情一寓於詩刻露風花揚挖今昔專門致力務去陳言率爾口占皆中矩矧可謂奇矣方其得意於詩萬鍾千駟不足以易其樂而忽若忘其窮焉至如雨中賞花欣然欲解官自放於埃壚外其風流迭宕亦可補詩家一佳話云余悲泊翁之窮而工於詩其胤君之託又甚勤故遂不辭而書己未仲秋大匡輔國崇祿大夫議政府領議政兼領 經筵

隘落拓遂放浪自豪幽鬱牢騷慨慷之所發混以酒而寓之詩詩天分也家學也才性超越秀雋古近體不致工於格律調響之間奔放激迅神機活動往往造境多人所不至如嗔如笑如躍如舞嗚咽歎歔悽慘之音若空谷層樾飄風急雨之驟至也又如擊金臺之筑而悲歌相和也方其酣嬉淋漓顛倒之頃雖公卿大人之貴志不合則不少屈青霞長虹蟠結于胷中而頓挫不遇未有一節一義之卓立者自托於麴蘖翰墨之場悲夫翁也昔石曼卿蘇子美窮而爲詩而有歐陽子揚厲之今世孰爲翁之歐陽子乎宋方勺之言曰昌黎多悲詩

哭泣爲三十香山多醉詩飲酒爲九百今東樊拾遺藁登梓未知集中泣詩爲幾飲詩爲幾不讀卷上悲咤酪酌之篇則何以知翁之人奇于詩哉翁數過余輒與酒酒後口吟不上毫相視而笑今思之人與境風烟俱渺茫矣而使我悠然而思翁者每於荷雨竹雪香銷酒闌時也己未仲秋大匡輔國崇祿大夫議政府領議政兼領經筵弘文館藝文館春秋館觀象監事原任奎章閣提學御書賜號經山老人東萊鄭元容序

詩有顯門不以萬卷書瀋心目則氣不昌不以萬卷書歸諸詩而充閑閱則材不博嚴羽所稱有別才非關文髻童閨媛姿性所出一二句之謂耳歷選建安正始以來峙然名一家者何嘗不由胸中之書毓其植而擷其英乎泊翁近世詩人之傑也天賦靈悟聰詣蚤承家庭之業既無書不讀而凡嘻笑怒罵窮愁愉歡一切發之於詩聲影典則標置排晷蔚有根據非史精子液與夫妙詮奇賞可喜可愕所停輾莫之使用故其詩鍊實鴻鬯機巧迭現不可狎而翫之蓋翁之生平固畸矣而惟其所自樂以心目萬卷書爲紙上萬首詩雖造次翰寫

必求合諸集獲矜持而不敢放過夫以古心古貌佐之以古書之不可抑於心者則詩安得不工而翁亦忘其老又從以忘其窮八十年矣是故一篇之出百儲俱備非箋註紛羅所易究繹而六銖之衣不見綻縫之跡夫以翁之詩謂軌乎徐袁者淺之爲知翁也翁之性慧適相近耳判不向兩家廡下作契活具眼者當自晰之也余少與翁父子爲紀羣之游每憶翁酒後燈前雙瞳炯如鬚毛郁然鍾動星落唵弄不休殆不似塵壚中人而今不可復得矣胤子汝成晚通文籍得一郵衮集遺稿將繙梓而壽之此汝成畢生至誠大願也第絀於力所

編摩不能十之四五而只此數千詩即吾所謂萬卷書也不既多乎哉己未仲秋大匡輔國崇祿大夫議政府左議政兼 經筵弘文館大提學藝文館大提學春秋館事原任 奎章閣提學楊州趙斗淳序

李氏世世詩家也自體素六隱西洲至于雨念而泊翁受之益昌其業有詩萬餘首哲嗣東樊晚用揀其尤美者約爲九卷而印布之徵序於不佞不佞昧於詩其何能言然而知泊翁之詩之必傳無疑也自古得於己者淡而後傳於人者久學問經濟尚矣雖百工技藝博奕彈丸之微莫不竭畢生之力耳目心思之用專治一事不雜以他乃造其極而名可以不朽詩何獨不然泊翁結髮爲詩至八十有七歲未嘗須臾去詩其享壽考而富篇章殆劒南後一人也學詩者必曰取法於漢魏六朝唐宋諸名家而山川草木烟雲之變化鳥獸之音助

其神窮通悲歡恩怨聚散之故感其情泊翁則不止於是過於目入於耳存於心思者無時而非詩無書而非詩如朱竹垞所云起居飲食夢寐惟詩是務六經諸史百氏之說惟詩材是資也以絕異之才專治而不雜若是詩其有不工乎泊翁之詩蓋三變少而窮居畏約故幽而奇成進士多與賢豪長者遊故晚而宏肆東浮於海觀出日之邦故老益壯而雄渾所遇之境然也其博取古今得於己而卓然自立者未始不同所以有光於前人而可傳于久遠也不佞猶及見泊翁濃眉長鬚眼光燁然酒後談百季以來逸事異聞激昂淋漓使人動

聽斯世寧復有之乎欲序其詩不覺放筆而慨然以歎也已未仲秋輔國崇祿大夫行判敦寧府事兼吏曹判書判義禁府事 經筵日講官原任 奎章閣提學致仕奉朝 賀帶方尹定鉉序

詩成一家而後始可謂詩也不於百家中博洽精研來
亦可曰詩乎一詩而函百氏之精華諸書而得一家之
渠獲者詩之大全是已夫斃石叢筍合焉而廣樂作彝
藻繪繡備焉而法服彰樽楹瑱礧聚焉而大廈成詩之
有聲韻辭華莖英之鏗鎗黼黻之籀紉而其氣格之闕
暢法律之嚴整虹梁雲屋之高驪而軒翥也然而磬瘠
竹濫繁音偏促截繡割錦襪綠無長則直一嘈贊已綺
麗已若是者不能窺曹劉之短牆况大家之間奧乎多
見其心目之不能博而精也泊翁才高好讀書尤工於
詩自賡歌三百篇以下漢魏六朝唐宋諸名家鉤玄牘

微翁清煦鮮自成胷中一部史然後發之爲詩其典雅
沉雄如球琬於楹序劍戟於幽燕駿發蹕厲若穿天心
而出月脅無待而行列子之冷然也隨形而幻蒙叟之
栩栩也最所難能者生平畸窮大抵多幽憤悲楚之作
而其悽然惻慚然奇崛之中藹然有瀏亮澹宕底氣
味卓爾不羣所以一時之能詩者皆望洋焉是與李蘇
杜黃三洪二謝異形同法而商確百家之鉅麗者也然
翁之詩淡造空宦抽出機杼自協於勻天洞庭之譜則
是所謂別成一家非蹈襲抉摘爲者也况翁之先自體
素六隱西洲至雨念皆以詩名泊翁繩之則詩乃傳家

之真詮成法而不待它求矣哲胤東樊晚用又克世其
業選遺稿裒爲若干弓鏹梓而壽諸後吾知其後之言
詩者必以是爲詩家之大方而求於是可以得百家之
粹也已未仲秋輔國崇祿大夫行知中樞府事兼吏曹
判書判義禁府事弘文館大提學藝文館大提學知成
均館事安東金炳學序

李東樊晚用將印其大人泊翁詩集一時名公巨卿多序之東樊又以是托余焉噫余於是托實有所不敢辭者昔我先君晚季休官家居日與騷人墨客會以詩律爲娛時東樊數數來故其唱酬居多惠好最淡余因是自弱冠知東樊而亦多有文墨之遊其時泊翁翁尚在世余時以所作質焉或獎詡之或非責之直截誨諭至于今言猶在耳其後余又與仲山交甚善每當花辰楓節同賞於山顛水涯之間逸唱迭和軸成牛腰不幸仲山早逝使人有吳鴻折鏹之悲仲山卽東樊之子之衡之字也去季會圍余主試於穎宮及唱名尚重獲選焉

尚重卽仲山之子曾余訪東樊於城西舊居時額髮在
傍啞啞方學語者是也以是言之余於東樊以文字交
契有四世之厚誼焉是余所以不敢辭東樊之托者也
至若泊翁之於詩也始自體素至于兩念箕裘聲韻可
謂世業也始自弱齡至于大耋造次必是可謂專門也
是皆夫人所知而又若體制品調之何如格律聲響之
何如則諸公之言已盡之矣宜不待余論而東樊之徵
序於余者其意亦必在彼而不在此也東樊亦老矣其
生平吟咏最富名篇傑作膾炙一世者甚多仲山不在
其能無塗牖覆瓿之患歟惟尚重早能成就收拾篇什

以謀不朽而又求弁卷之文於余余方滋筆而待焉已
未仲秋崇政大夫行吏曹判書兼弘文館大提學藝文
館大提學知成均館事 奎章閣提學宜寧南秉哲序

泊翁詩鈔目錄一

卷之一

郊居 甲午

與舍弟士鎮士寬同賦

藏書

散書

借書

送書

看書

種花

乞酒

命僮

客至

晚春

過尹文卿墓

行役

記行

書寓所壁上

古寺

贈僧

觀刈

村俗

野望

鄉里無可與語又借書不得

午過山下只成上截四句夜歸續之

重陽

憶弟

幼女

九月二十日夜夢謫居舊主人

寓庄獨子為虎所噉

歸家拈前韻

拜漁懶 乙未

友人至

江行

題友人畫扇

客至

穎草齋與桃峽晚菴共賦

除夕

漫述 丙申

秋熟與同人共賦

與明遠拈程雪樓

金元二字携酒見過

記行

丙申除夕

悼殤兒

舟行 丁酉

與士寬拈後村韻

題雙山子詩稿

蛛絲

錢塘紅即友人吳子明所昉戲作絕句

哭秋月南文 玉 因追挽

幽居

次徐文長韻

悼鶴

題元謙之遺稿

獨吟

養虛宅

過養虛宅與明遠同賦

石村漫詠 已亥

觀梅思明遠仍兼呈野叟達夫

題畫

試筆

殊無賴閒書遺之

窮處

示友人

偶書

與舍弟士鎮拈明人韻

與友言別

冬日閒居

除夕

仲春士鎮請余賦詩得門字

鋤菘

卷之二

田舍雜詠 在桐泉作

送鐘城使君

友人宅觀梅

做舍舁巖 在金浦郡西 與士鎮拈長蘇韻作

臘之廿八

翌日即除夕

對雨二絕

獨立

元村晬席與諸人作

清潭與洪令遲稼 樂任 兄弟同遊

漾月樓春會

又拈放翁韻

又拈

夜拈

苦熱

瓶蓮 並序

愁霖

苦熱

喜涼

仲秋到長川共賦

歲暮樊川又會

自樊社來長川復集

仲春會于 永祐園齋共賦各體詩

又拈多字

各賦五律

又賦

以簡齋春生殘雪外酒盡落梅前分韻共賦

共尋清涼寺用常建五言詩分賦

次放翁韻

次石湖六言韻

共讀楊誠齋詩戲題十絕

古木聯句

芳草聯句

殘雪聯句

怪石聯句

橘盃聯句

硯滴聯句

催花聯句

待月聯句

自東齋歸復拈

復會樊川見留三日聽秋對酌

泊翁詩鈔目錄一終

泊翁詩鈔卷之一

完山李明五 士緯 著

郊居 甲午

顛沛窮途暫僦居古人比我定誰如行將隱矣只須屐
對即嗒然猶勝書花尚幾窠宜爾飲茅纚數把足吾廬
千軸牙籤貧散盡審思何物不空虛
晝無剝啄少開扉牆雨迷濛林木圍懶識枕痕長着面
貧看酒澆亦生衣晚花常愛扶踈影輕蝶紙工欹側飛
零落親朋無一戀不如簔笠下漁磯

與舍弟士鎮士寬同賦

藏書

書爨富時家益寒每拱披閱歲華殘喜將眼鏡除花易
悶是麝香辟蠹難可使屋間堆塞破翻教世代鎮長看
最憐兒輩知斯樂晴日和風好曬欄

散書

千軸牙籤掃地寒古人冤業劇叢殘傾家已識燎毛易
拚命雖求得寸難勢客還將空手取癡僮不直一錢看
零星四聚浮雲散陳迹蒼茫獨倚欄

借書

床脚支高本分寒僮肩擔赤爾軀殘邀如佳客來何晚

移似名花乞得難富戶偏憎充棟積友情多謝閱季看
靈心慧識將培養最苦斜暉易下欄

送書

蠹魚苦癖半生寒雙眼將花燭燼殘桑下宿來畱戀劇
柳枝老去割情難赫蹄相促頻違限包裹還思未盡看
借我數季應快了終悲一八鎖窓欄

看書

飲酒看花閱歲寒心蓬交塞眼塵殘平時遊戲追思悔
中歲文辭己用難黃卷咀華方有味青燈剪穗細成看
五車那得三冬了妙策無如不下欄

種花

淺土堪憐受薄寒病根拋却恐春殘
蕾繁枝幹披還易膚潤生枯驗不難
妙用占風須晚折人功灌水爲先看
半庭香馥堪怡悅預爲憑觀葺小欄

乞酒

依樣書頭問雪寒樽罍奈此已傾殘
白衣勝事休專美奇字玄談可詰難
乾肺漸令塵土起寬腸直許洞庭看
醅醅且莫論賢聖恰好含盃月上欄

命僮

東隨西挈奈饑寒窮道劇憐恩澤殘
雨墮無爲縛簿可

庭寬多事灌花難頑何答罵當殊遇嘲
或鬚髯作好看田事歸鄉都聽汝須治
豚柵與牛欄

客至

客至柴扉已噪鴉冥冥聚落送義車
名心香爍餘孤炷戲事雪翻成數花
世界那堪消此恨溪山已喜寘君家
街頭臘酒應浮綠踏月行沽倩小义

晚春

去季如此又今季吾道祇須飯後眠
老態漸來無避地機心已息不爭天
窮生常比花遭雨宿業何堪柳襯烟
夕景教人多暇意纖雲過鳥見晴空

過尹文卿周欽墓

草芽露白柏抽枝尹子荒墳實見悲哀樂須臾何得失
彭殤畢竟合如斯千磨百折吾猶住葉落花開爾不知
解說死真生是幻癡人休謂妄言之

行役

驢子凌兢山角遙誰家池館夕陽饒秋心寥廓悲何已
雲性虛空影易搖萬木忽高齊聽葉一溪旋折屢過橋
此行詩料無多得噪鵲斃離供白描

記行

淨是巖阿清澗濱馬蹄鬆快絕氛塵昏鴉曉鴈如相失

去雨來雲故未親老大石身憐過佛嵌空松腹許容人
雙叉山路縈如髮只賴樵兒指點頻

溪畔孤松死與濱倒垂枝葉尚離塵縱橫蒼蘚多般苦
棲宿幽禽一意親孤起踈烟交細靄相依老石拱行人
袖鞭短僕憐癡相膚粟濃寒索酒頻

書寓所壁上

城裏多忙山裏寂此心自擾無閒時三千世界蒲團闊
一百光陰燭火遲名己不爭差少謗生惟無幾暫過悲
喜看豚圈接牛欄種種田翁契活奇

古寺

卵色彤霞斜照凝周遭葉落詭垣層古龕正跡辭巢燕
閒院空留捆屨僧衰盛到頭誰不悟荒涼滿眼自難憑
幾季敲磬今休歇無復清晨警耳能

贈僧

寒僧禮數送如迎楓樹西偏曲澗鳴留與一言終繾綣
非緣三昧自高明念珠元是隨凡例乞飯祇應備苦行
未識何邊真極樂西方人亦願東生

觀刈

上下田頭歲計淡閑看最得老農心根猶青澁嫌泉脉
穗或輕沾悟樹陰爭得天晴誰肯後長愁霜損亦非今

祇思填送柴局破不覺全秋割境侵

曠然平畝僅唯阿人健鎌長衆力加結束青蟲跳躑乍
披離白鷺主張多勞歌壠底衝喉發細話耘時曝背過
多寡中除雀鼠耗農夫斟酌不曾訛

村俗

百年只願碗中豐歌哭隔山相不通人事舌饒俱鄙瑣
客程頤指混西東極憐轉朴仍成野將恐多癡更作風
眼底稻黃垂兩壠每言比歲更前凶

野望

高鴈縱橫破字回雲纖風緊野悠哉僧籃始見青梨熟

樵擔忽驚黃菊開爲客清秋偏愛惜多愁斜日共徘徊
閒心點竄詩從好原本少畱吟轉來

持來書策已經屢日眼從心厭不耐再翻鄉里無
可與語又借書不得懷殊惘惘

書如雅士竟難求大覺荒村不足畱未解從人看暮奕
劇知比屋借鋤耒寥寥己是無佳意炯炯何堪負兩眸
可惱茅簷消一日農談闌座苦喧啾

午過山下只成上截四句夜歸續之

短屐披幽樵徑曛霜前山菊炯無羣松根穩似憑鳥几
石勢平宜展古文蟲近牢騷何可說鴈遙寥亮尚餘聞

閑來洞客乘明月枕畔殘盃夜已分

重陽

李氏莊幽閑屢頻殺鷄炊黍午餐新細看庭菊如常日
忽見家書當好辰夢裏悲歡曾閱地罇前潦到見成身
蕭條何處非重九底事偏傷作客人

憶弟

客中偏苦送居諸聚首當期白下廬秋盡聞鴻同此意
夜分剪燭檢何書少季心易尋常別隔日身如一半虛
憂患頻經情自弱可堪黃葉墮階除

幼女

連歲南征信馬還長貧夏不問辛酸家人杳杳應看月
幼女憨憨與倚欄補綻寒衣空尺寸抹塗雙頰解鉛丹
正如絮襖行林裏梢棘句牽步步難

九月二十日夜夢與崔學究鎮默聚首悲歡宛如
辛壬良久而寤月翳窓檉幽燈半床梅山是我
三季苦行之地偶一念之神寒骨驚而今夜作
如是觀未知常時感崔之義更悲其己爲異物
而會耶又未知今當作客多觸往事而發耶崔
卽謫居主人也

輪劫是身己自拋三年無恙寘書巢顛風仆雪迷何向
覆雨翻雲盡故交死去應爲救苦佛淚乾長媿報恩鮫
堪持小事警衰俗客馬無藟捲屋茅

寓庄獨子爲虎所噉

驚人喫血赫然光殘飯尚看畱近床未與結仇何世虎
自來宣力底心俵淡松疊嶂身餘幾走月漂星勢太忙
縱識今宵甘一飽對頭冤債倩誰償

歸家拈前韻

耳熱猶酣何郡酒入門仄仄已寒陰窮人况值秋冬運
老屋誰非逆旅心竹葉正胎空盞媿藜羹眞憂破鐺音
貧愁且寘吾還富胡草詩篇藁裏尋

拜懶漁 乙未

隱約茅茨隔小丘，危機歷盡即相求。
燕非薄俗窮猶到，花似佳賓挽不留。
江色全供依杖綠，槐陰半覆散碁幽。
前銜校理偏閑散，取次殘醺睡與謀。

友人至

自是窮人眼易生，芳醪千斛儘難平。
不知春葉如斯變，即見寒鴻為底行。
妄想休教爭造化，殘詩只恐近浮名。
如何分解吾生事，蕭瑟黃花暫住情。

江行

送者皆從厓上返，帆檣戛戛動蕭晨。
垂楊澹靄微涼態

白鷺輕波宿世因，與俗難諧宜削跡。
去仙無幾便離塵，胷中悲恨貯千緒。
拈出何堪說與人。

題友人畫扇

無多僂面裏，高想自安排。
仔細靈心到，空濛道氣開。
仙人長似豆，滄海大於盃。
偶爾能成妙，畫師云是崔。

客至

扶踈冷暈澈肌膚，雪與梅花德不孤。
不有化工能布設，絕知道品自清癯。
捱過妙境思難覓，句引同遊遠費呼。
人已瞢騰渾熟睡，撚鬚苦詠似余無。

大布一斤飯一盂，將身只可處閒娛。
良宵有限何須待

明月無鄰更覺孤天亦會心清掃鬻人能好事遠提壺
與論今古枯澹物先數古梅其次吾

頴草齋與桃峽晚菴共賦

逶迤行屨日懸車一意君家路不賒幾句能輸緣未了
數人猶足會無遮浮生自覺過空鳥流歲誰禁赴壑蛇
小小悟頭難把捉燈前梅影等身槎

除夕

流光誰可力牽回一直茫茫不見隈何限癡歎添得酒
無多把翫落來梅過前飛鳥如相約垂別行人不待催
己識消磨窓下隙殘書古畫作高堆

人言此歲轉頭無仰看星河亦不殊殘雪能留前事白
寒梅未免此心孤空教名節臨書見追想悲歡與燭俱
兩對題詩殊未惡卯君筆舌慰窮途

漫述 丙申

聖人雖在上君子有窮時李觀作是語古人亦許悲觀
世驚齷齪觀我厭支離腹裏車輪動至悲說與誰哭當
爲人怪笑當爲人癡筆墨心之餘粗可代言辭腸曲四
照人玲瓏太無遮所以言出口粉飾不增加此事徵何
所閱歷優吝嗟先言目所到請君靜無譁子弟生富貴
自知但自家十九白如瓠食玉衣綾紗閒閱縹緗帙眼

海鏡言金 卷之一
膜翳成花門戶乘旺運雲蒸夏霞鬱輪蹄填巷口屋頭
灸手熱窮人有緩急近前便噴喝其心大忍人一言可
轉日福田何以廣冤業終難脫眼前所捨施所活不償
殺半世多知舊此類附蟣虱在家稍了了出脚便凡流
骨頭何嬌嫵傍人牆壁求沾沾一禱灸感恩不知休贊
揚主人賢前代寡其儔矜寵似婢妾步步衣裾摳旁觀
不忍笑自言百無憂又有一種人不喜坐家裏人心不
收管搖蕩似活水招羣結朋類東西無定止只管閒是
非偏愛搖唇齒向人伎且求要業造何已善人一不幸
行路尚淚視本是師弟好朝夕供拜跪極力搆無形巧

言亂朱紫當死莫之然得生胡忍此天地愛生成蛇虺
能不死此世蓋棺前此心常咄咄流落宜不偶曾前自
突兀交遊非惡人門地非華闊我家雖貧寒累世傳清
節衣冠三百季讀書綿不絕先君立志苦為國當死義
文章已其賸應世更為累貧窮處下流多遭時宰詈浩
然蟠胃氣踈涼無所寄平生少經營脫略哂微官因人
成遠遊聊復慰歲闌滄溟撲地流遼野倚天看暮境漸
廓落高名益辛酸交際失黃閣故人掩青山環顧無可
語圖書屋數間寅季缺二疏語及內家事人所不敢道
一筆數百字忠義斷無他庶幾回天日急雷發無妄天

地俱陷缺執政張膽力抱冤不容說朱門傾奪際細人
事口舌搆捏誰無罪不肯一分別古賢立名節後世傳
嗚咽視死縱如歸九原痛下徹引蔓瓜多少燎火俄頃
滅何可誣別人相與入陷甯親知不敢問無辜畏首領
秋月千古士友誼衰世警誇驢白門曉把手淚如縷窮
奇善善類鬼域中人影是歲彗星出文運掃四境雖有
五男兒縲紲不許代仰天天何高血灑臍欲潰不孝當
死罪嶺海盆竄配累累解枷鎖鬼形言可再稚弟僅十
齡宛轉哭相對剃髮纜覆額先人所鍾愛冤極仆地哭
骨寒肉猶顫同係十餘日出獄似初見握手爪痕透接

面血痕濺俱言慎勿死抱頸盡情戀一門九人並刑吏
數一遍已被鷄犬逐世世兒隸賤拘束聽所之南荒各
異縣散去地盡頭雖死有誰報痛覺慈母心水火恐可
蹈禱天更不得蹋地死心倒庶冀一面別向吏义手告
哀痛不動人怒號一何暴奴僕竄何罪昏黑哭攔道貧
家少恩澤連累汝多負呼號街路側挽衣競先後徒亂
方寸地強噴還不受是身問餘幾魂魄蕩已久兩吏持
闕文悅似導靈幡押赴康津縣遠近那敢言驛卒本鐵
腸鞭扑踵血奔欲步脚不隨况又霜雪繁路邊有植碑
云是孝於親旋門不爲貴彼誠是何人犬不食我餘頑

忍到今辰彷徨蘆嶺脊躊躇錦江濱引決易投骨撫體
夏遠巡謫所海濤壯剩携一影來窮荒信佛地居人爲
之哀松竹成籬老橘柚倚門栽觸目似異域懷抱安得
開熟思無非痛延拖一縷纜要將半死身獨面寒窓壁
家書千里至鵲噪屋之脊書封纜入手雙淚不待坼此
生復何望慈母又枕席劫後破落戶扶持勞寸尺經紀
辦辛苦頭髮無可白穉妹仔細報我心元非石義訓教
畏約不信山河隔何以慰母心長恐病成劇年華到骨
悲絕處春光麗花開何不歇鳥語猶常例聞見只增慟
逃避百無計劫火大元會燒盡三千界空諸所有物然

後悲可制永日腸百折長夜魂九逝夢亦窮人夢流淚
盈枕際弟兄散之四一書動費歲行人或急至消息恐
死契驚定仍叫苦字字向誰訴饑寒爲學究瘴癘成病
痼幼弟不糊口伶仃半衢路何事不相觸痛哭海山暮
日月遽三易愁中亦一驚將心實何地黃卷眼猶明百
好消磨盡宿業尚燈檠餘魂收夏小昏瞽苦難清得後
已遺前復搜觀姓名慧心一路開披榛似獨行往往得
佳處幸無人所爭奇觀嫌易盡徐讀優低聲覩破作者
意窮後學乃成今世焉用文只可送平生豈好爲人師
困頓我生初村落小學生執卷悶起予聒耳強叫吼粗

氣不可除衆兒俱一律問義墮空虛狗子有佛性鈍根
還不如主家淡然燈手填麤殺書記姓粗可休願言早
把鋤其父聞不喜家麥十斛儲爲口費心多飯粥嗟賴
渠是身真木強如是抵窮陰居人重節序香火追養心
寒鴻叫遠浦白露墮庭林他鄉待家信只看血沾襟眞
是廢佳辰不啻抵萬金天心忽幹旋放釋得喜音兄弟
緣未了子母恩尚淡生人易聚首遺慟死可禁客子辭
磬折斗頓賴至今三季救苦恩垂別情不任萬般苦行
地回首尚梅岑風雪撲瘦馬凌兢故路尋山川我何堪
據鞍淚泫泫生踏漢陽土流離豈所圖入門肝先摧一

號死更蘇阿母此何狀撫背哭更扶凜凜氣息微淒淒
顏色枯可懼不可悲暮境迫桑榆弟與兄後先差遲皆
遠途齟齬不卽認瘦黑俱丈夫屈指宛成數面面悲與
俱來時聞人哭親病久不慵醫生親自邀藥石手自攻
天理小可伸天季尚謂凶比我誰尤痛餘哀繞四峯七
顛八倒去先墓哭大冬霜雪是何心蓬科不開封噴薄
皆冤血較量幾斗濃窮劫悲不窮只覺劒攢曾小子獲
來側俱是偃僂蹤如近還似遠九地尚重重可望更可
攀楚楚只短松延我父子緣今世如不容絕海遵當居
窮鄉賤作傭磨頂放於踵怡怡疏水供此事兩至樂遺

恨奈何從衣錦與衣薪達觀將無同終然爲人子凡百
太忿忿後天償短緣天屬倍加隆累代墳墓荒相距僅
百弓亾父在世日丘木痛餘風祭享潔白誠門楣扶植
功祖先陟降靈向來危急中何不傍上帝破涕訴危衷
有子某在下大厄遭人竊三世傳孤子不忍見其終小
弄造化權一時文字工其罪乃薄譴天道况至公有孫
雖衆多摠不似乃翁癡迷有若無只可贖一躬何待後
時告血氣本相通幽明事多違未能得蒼穹果然想淒
絕不然隔朦朧想窮無不到死氣身不重經歲守者倦
悲風吹故隴斬伐到松根餘者只臃腫因境欲斷魂吞

聲更旋踵先公有文章大家知者寡平日視涕唾落紙
更不把圍墨與覆背塗者兼乙者雖未脫草藁何擇更
何捨家人眼如茶安能辨真假誤認作簡牘褶色怕人
惹天又嚳斯文箱篋火俱赭方冊與連紙曾寄他人寫
不朽不在多十一餘今也金銷而石泐永傳千載下圖
書一萬卷辛苦何能免務多不務精小說與墳典宋刻
字如手監本紙如繭十口雖屢空百憂忒舒卷晴窓試
手蹟卷卷分訛舛選文半硃評抄詩多墨圈目錄隨其
得牙籤仍其件俗客擾天機對之常黽勉阿參頭觸屏
殘更燭屢剪術士歲言庚嗜好久不能噓唏仍顧影在

傍涕垂膺不祥仍成讖如是我聞曾輪劫又書厄聚是
散之仍何論外物假床架掃層層搶來皆勢途偷去半
市廛缺裂不復惜所直輕一錢老婢亦犯手飢寒驅使
然牆外引書僧荷擔赭兩肩常時揀風日拂晒列窓前
貯箱憎蠹蝕近壁嫌蝸涎豈料到爾輩爭奪任手邊漢
高所創立新莽所棄捐大小雖不敵乘除理何懸我歸
室如磬滄桑俱變遷錐也地並無家徒壁又穿牛籠殘
書秩一篋舊衣綿不言生理苦誰知阿母賢缺盤朝闕
菜冷厨午無烟感激從憂患天真叟俱全卯君字士鎮
性方智且圓常患才不少所就屢百篇邇來好觀史繪

貯三千年廢爲踐踏劇動輒是非纏癡黠小兒輩何意
競翩躚身分本磊落不肯受人憐金浦先楸下瘠确數
頃田麥熟下就食草草結短椽安穩是天民將老於斯
丘跨馬到即賣山市易一牛披簑引流水把鋤劬平疇
移書報阿兄風味不勝稠團臍蟹初肥香稻酒新藟爲
此大已贖我去亦乘舟炊黍即鹿門種瓜非故爰層圖
半壁粘農書滿床抽仍爲盡室計可意是青嶂柴門縛
井字葛巾製村樣何必株守若信宿任跌宕衝泥長齒
屐度險過箬杖是時木葉脫溪山分定位遺墟申相國
古洞魯叅議亭榭擬久視當初二公意文學誇獨擅功

名赫無二死去應覺夢今人倒是寐聚落凡幾家更無
道姓字興亾固如此替人枉灑淚險釁所經來剛腸已
屢換不可久離居數日心已亂火急賣我屋債錢當其
半長往仍歸宿餘季少把翫半生成一笑漁樵已自斷
窮巷人不買大計恐溷散小屋絆人行生涯亦可歎

秋熱與同人共賦

晝雨差強意衝破殘暑會羣遊壞美陰獨往驚急瀨晶
瑩閉虛窓清涼不索外常恐過優逸不堪事衣帶買苽
苦求益沉水此爲賴闕然內無香老帶雨仍害雖非久
長物盤蠅惱人大

與明遠拈程雪樓

秋樹苦風雨乾淨葉當落身世兩無策中年任止泊夜
吟頻失眠午困多因酌此事未堪廢劇知情無托鳥雀
真多事陰晴語強作可不期來夕暉在叢薄與君須
跌宕本分宜邱壑

金元二子携酒見過

不飲負百季無詩是半人未能行胃懷祇可供嘔呻紙
滑兒女膚罇湛醜翻春言辭失詮次醉人何當嘖二客
無間然聽我放天真樹影忽縱橫素月側其輪瓦溝露
如瀉蟲語細無倫只恨人未悟天機照眼新

記行

禽啼窈窕不成喧梵舍西偏嶺勢繁忽值樵蘇驚絕險
遙聞鍾磬恐黃昏厓懸但看前人踵蘿禿猶攀亂石根
小憇只緣理苔屐平林意外得孤村

峽中不復記季華境轉佳時忘路斜巖罅皓凝窮臘雪
峯巔紅坼上旬花寒暄偶爾氣相異造化均停意豈差
日力垂垂纜五里山家樹木澹生霞

過盡松陰迴不遮夕陽驢耳影尖斜盃隣久涸添溪水
衣惜輕沾破嶺霞何意試飛青項鳥自知設色碧臺花
迷離藉草頻思睡行記幽芳字抹鴉

丙申除夕

小少光陰苦太遲驟驚鬢髮欲成絲殘盃乏是留何客
舊曆祇堪繫此詩孤燭替人傷往淚踈梅出世耐寒枝
回頭僂作無涯想三十吾生亦易衰

悼殤兒

乃翁經百變涕淚盡平生幾點心頭血信難爲汝傾人
言懷抱物胷中遺易平空花當眼墜小鳥過耳鳴暫住
有餘跡見此恨始縈教婢火垢衣命奴覆藥鎊始知了
了語如燈更死明幸不似我活危途偏側行病妻要壁
面枕席委殘更只緣不聞道終是未忘情君與我猶是

風火暫聚成劈劃得千歲到頭遽一驚翻盡楞嚴義虛
窓雪打聲

舟行 丁酉

兩邊踈柳喜重過尚憶江村酒味和卽事雲移藍色出
底心鷗亂錦紋波順風商舶誰能後返照漁情已肯多
蕩槩蠶頭同朴李不須詩格問如何
汨汨浪花證棹過迅波還似住義和宿因楊柳相依岸
浮世蜻蜓略點波樵艇受風偏愛小水亭選勝互爭多
隨余百里惟雙眼湖看摩尼夏若何
次第峯巒惜易過中流氣候失清和直驚風力仍移岸

復恐帆頭混八波窮相定知如我少天公未信爲人多
半生欹側行難得比着危舟可奈何

與士寬拈後村韻

江鷗嗔我暫淪盟耐住塵埃厭薄情借看古圖疑僞本
賒來市酒盜佳名僧誇高瀑雙條壯友約晚楓千樹明
已把餘生供戲劇山遊料理杖先橫

題雙山子詩稿

吾友雙山子凡百迴無羣心地如朗月炯澈掃塵氛文
章似晚香歲久定生薰我死百年前何由一見君我生
百季後或能讀此文真見今世愈詎期異代雲未害不

知者噴我妄云云

蛛絲

蛛絲自張勢憑人簷角依經綸要殺生豈知與天違
蝴蝶無邪心蜻蜓自忘機春風喜作妍悠揚不肯歸
枉被一網打騎危事遂非何恨渠少恩應悔自妄飛
尚得逍遙樂蜉蝣會夕暉卑之母甚高可全性命微

錢塘紅即友人吳子明所貶戲作絕句

咄咄襄陽縣但聞山水清何處無此勝竟蔽佳人名
茵溷何分別郎癡恨更甚但恐所墜花未爲第一品
酒醒池館夜急雨打荷鳴點茶爲消渴鬢亂釵半橫

妓坊千丈泥是身一蓮花請郎嗅清香有何滓穢耶
嚙臂畱前盟相思苦何已芙蓉看秋霜香死根不死
儂面易渝花儂心永持玉憐貌不憐心還珠買空櫝
春水何心碧春花底事紅一一惹離恨閉戶罵東風
黃金秤可數明珠斗可量儂情無斤兩何以報阿郎
箱衣摺痕細釵股蛛絲懸未堪爲別人強笑作春妍
郎言雖未真道情死可了癡絕焦仲卿風流張京兆
才子數多奇佳人事好乖只願兩癡歎再造命安排

哭秋月南丈王因追挽

默數大千一歲中尋常病死幾人同豈知斯世文章在

最是平生義氣空一色邱山誰得失兩般造化奈窮通
悲冤吾作是言已無甚高論見笑公
後生晚契藹如雲百不能猶愛十分終使是心先撼撼
更將何語可云云因循已到柏之實落拓仍空馬也羣
今日剛腸題到此溘然恐闕悼公文

幽居

掃去凡心媿老莊自知一壑也難忘植花全闕終季菜
買鶴仍殘計口糧老去情緣偏此輩春來蔥蒨爲斯堂
科頭野服俱佳客百見如初喜舉觴

次徐文長韻

曉雪巧遮春色迴濃寒柴戶閉江隈素娥縱使谿同谷
青帝猶難杏趁梅漸看蟄蟲行自引已知候鴈喚相催
殘缸枯枕客歸後紙與床齊墨作堆

小舫移家湖下風殘書無復發雄虹人間歷試諸緣苦
老去逾知一切空菜甲已交勤圃客鷗羣不亂慣漁翁
湖霧汀烟收向夕上流青嶂插叢叢
可數來禽毛羽明臨江窓影夕尤清古人望望心逾迴
造物茫茫力可爭懶似誌公貪佛溥閑從蒙叟息天黥
手抄十紙繩頭字纔了茶經又酒經

恰望二毛欠數年所經不啻閱桑田千愁常較抽絲繭

滄海詩金 卷之一
雙涕長如洒血鵲自是透疎何益世方知濩落不由天
無心更復看春去一樣寥寥禁足禪

悼鶴

里老不仁甚晨寒拔篦毛未安養鴨柵可試割鷄刀華
表魂應返孤山命未遭可贖幾凡鳥平林競噪號
不聞瘞死者何望放生之衰世少完物古人亦許悲聞
雲殊不極明月更何爲全失亭臯趣凄然一賦詩

題元謙之遺稿

是身如電露今日又謙之浮世堅牢物靈牀一束詩

獨吟

閒教藜杖試身健懶敲油窓弄筆尖秧是後生幼束髮
麥從何事喜掀髯蟻行過水斜知避蝶翅同花動認粘
小小排成貧景致綠莎如剪檜陰含

養虛宅

馬孱如狗蹴泥曛木覓微茫雨未分逢處忽驚孤鳥度
愁端俱引百蟲聞牆怕半頽姑種菊簷驚餘滴且看雲
豈憂今夕難消遣翁有新詩絕不羣
更取高燈繼夕曛對君情緒即難分淡盃已復忘衰相
佳句何須藉舊聞屈指交遊驚逝水回頭閱歷悟浮雲
不辭客夜淋浪雨祇是聯床喜作羣

泥淡意欲取舟回簷角頑雲悶不開
蕉敗轉悲催老至禽窺側想怪余來
懶於改字長畱草喜或拈碁小用才
不見金生多悵望茲遊當續菊花盃

枯寂虛翁挽不回翻因雙樹板扉開
灌園只揀黃花在避俗惟通白鳥來
政欲圍碁邀客子還孤折簡罵奴才
去宵燭跋知情懶詩不更添只吸盃

過養虛宅與明遠同賦

離家秋夢多江曲斜月亭亭出郭高
稀粥村奚才可履殘秋客馬瘦知毛
松杉並長膝爭薛梅菊相持劉對曹
何害不知一奇字煩人輔齠未曾勞

闌風伏雨動經日秋向鳥行頓覺高
俗物何堪供阮眼古人祇得效潘毛
竹交美蔭經誰躅蟬足餘涼及我曹
安得嵌空石注酒遞相杯飲廢觴勞

石村漫詠

已亥

閉戶非高卧偶然松栝深飲猶煩靜
界詩亦損靈心洞勢排寒石籬根補
小林床書刪百卷可忘歲華侵

觀梅思明遠仍兼呈野叟達夫

踈花新未穩似爲及時奇紗隔鼻先
悟月遙情可知未輸野叟酌當續達
夫詩吾不信蒼髮居然失數枝

題畫

水流花復香偶坐蒼厓晚使有一詩成從知淡而遠
芳樹坐更高鳴澗意逾靜不與一人來已恐損幽境
韻折層厓瀑香來絕壁花儵然如有悟衣袂捎風斜
親植淺紅樹花葉不謀合乍噴小兒折翻悟當寒臘

試筆

頽卧有何得窮季只大床榮枯雙眼久顛沛一心長爨
富抄詩卷素封占醉鄉自從梅入室眠食亦清香
殊無賴閑書遣之

月來寒亦喜迎接掃堦除會見孤村靜逾知萬木踈交
遊殊古道文字慰窮居漸覺無機性真能處牧漁

窮處

窮處無依倚迴隨江月孤僮奴從鴈鷺門戶入菰蘆雪
後蕭蕭者罇前浩浩乎梅零無一句慧業硯池枯

示友人

奇愛烟成篆閑知月入門世情淡蠟味歡趣減潮痕石
丈無名氏竹君多子孫疑文頻乙字燒燭更抽翻

偶書

燈花書字細香炷道心微雪屋周遭合洲禽影響稀妻
能隱米桶吾復卧牛衣崢嶸只可望事與前修違

與舍弟士鎮拈明人韻

無因獨自悟萬象入空門寂歷松圍屋虛明水接村奇
書折福力綠酒瀉悲痕老去仍觀道心香一瓣存

與友言別

北風湖上屋燒燭到晨鷄肩宇有新詩輕輕把筆題

冬日閒居

促令倒淡酌寒威萬木平風禽非爾力雪月爲誰生晨
夕先湖澁悲歡併洛城槎枒猶不遣放筆作歌行
江籟生虛夕孤亭因樹迴正從黃卷得未訝白頭催友
札封官廨妻言試臘盃名根猶不着心死併無灰

除夕

星星已到髮咄咄竟隨人瓶粟躬耕盡床書手撰新窮
居况改歲堅坐可迎春情緒無堪樂清罇與我親

老形看已具孤館似行人更覺鷄聲惡方知酒德新舊
觀祇有雪絕處幸逢春身與名俱幻蕭然未足親

仲春斯和喧寂異致怡然自發亦復慨然土鎮請

予賦詩乃得門字只許同韻不拘多少

已復仲春來學道無可言形骸是鄉里哀樂乃籬藩平
生如有悟紙墨未能煩我心靜不起潛然滿一罇偶醉
卽佳日衆綠入柴門山禽爲晝寂飛來試一喧花發豈
無漸恣意養其根細瑣從各體化工用心繁看取記早

晏名山共盤桓

鋤菘

種瓜山脊田五月苗仰枯溉種惜枉費未忍竟荒蕪往
視色不悅揮鋤瓦礫俱青草未即辨泫然露所濡往往
自能長支蔓稍相扶功力罕及此始知土膏腴稚弟得
新詩流汗走示吾意秀而句圓咨嗟用韻粗犁然欲相
和餘畝且須臾心與手不應屢誤傷根鬚未能自強作
响愉命小奴

泊翁詩鈔卷之一終

泊翁詩鈔卷之二

完山李明五 士緯 著

田舍雜錄

在桐泉作

借守田廬李珀奴西風每到數寒條不教一箇嘗秋實
剝栗都空拍棗無
繽紛打稻喜西風仄岸荒陂結束同艱苦一年收易盡
收時那及喫時空
野飯蜂來盞蟻緣繞場禾穗坐如季打殘秋日翻嫌小
何獨渠田雨露偏

藉草斜陽與睡期田夫酪酊任渠為眼前飯碗如山凸

村婦何曾數米炊

霜粒收來真可哀蕭條十口漢之隈老奴押運無全石
雀鼠方知果壯哉

朝收楊子豆初黃暮刈陶公秫又香辛苦百季設如此
斷無餘力到文章

指點溪山屬雨餘閑逢田叟問何居窮儒不得讀書力
翻怪生涯足一鋤

翻覆殘碁眼耐寒窮季林下賓身安蓑衣草履平涼子
粧束誰編野史看

并字柴扉晚始開溪淡厓仄逕仍迴守菘棚敗旋觀稻

偏

推測殘年夕景催

蕭瑟舊觀山菊花悵如三宿老僧何不曾培灌人功力
一朵雖開已覺多

露濕芒鞋獨往時桐泉洞主愛圍碁傍觀勝敗何關我
擔閣秋窓改舊詩

少日抄書妨老眼強知酒盞更添悲不消心力閑隨筆
敗菊殘楓捏合詩

牢騷胷次事難平到處相逢喜麴生窄世不憂行不得
一壺可隱是蓬瀛

傲骨初年仙不凡凡心何以晚禪叅方知好事都捱過

目以能詩面發慙

毫端藻粉略成言餘子高名滿耳根唐宋藩籬爬不到
無如來處妄稱尊

只趨平淡不趨奇老去方能格力知縱受今人輕貶駁
後楊雲始愛吾詩

短景難消髮欲華寒鴻一一客邊過重陽與我無干涉
山菊雖開酒未賒

阿弟遙遙衝薄寒夕烟何店却驢鞍秋窓聽雨新詩在
待爾燈前下字安

聽盡寒鴻梧葉俱客邊秋月解愁無依依八戶如相覓

酒盞元來德不孤

吾生不偶與誰同燈下唐書閱一通興歇纔能隔數紙
盆花真是霎時紅

浮世祇圖不朽奇暫時榮貴暫時悲唐家瓠白平章事
爭及寒郊瘦島詩

世間得失不悲啼末抄區區飯碗齊拾取平畦無滯穗
霜天井臼倚寒妻

寒知黃菊漸增寒爲客蕭條遣夜難細寫桐泉看月作
歸家擬與子由看

田家信宿歲華催客意搖搖紅葉來醉倒乍忘身世苦

情他蟲語替關哀

今年又負菊之香阿弟何當共對床屈指捱過期日子
遙知征馬骨如牆

送鍾城使君

缺

愁州使人愁把酒慰路永汪洋撲地海砌礪界天嶺丈
夫不經此安知艱險併但憂官事重豈言官况冷一條
豆滿江女真攬要領居民悍未馴要利冀僥倖易牛私
予北採蓼安過境爭端起豪末十分詞動靜點污官長
累搶攘邊塞警治法寧失和不可一以猛簿牒朝衙罷
簷日未移影搗頤小白山烟嵐變俄頃邊風夢仙漏漢

月憶畫省異日循良傳條理記井井敢處賢人名贈言
從公請

友人宅觀梅

香爐擯却帳遮塵硯北青枝點檢頻衆卉稱尊無佛處
數人多幸有仙緣欲開更止經營久乍澹還濃造化新
身分寂寥偏似我幽懷歲暮與誰陳

做舍舛巖

在金浦郡西

又值玄冬懷緒寥慄與士鎮拈

長蘇韻作

比如元是此村人已把衣巾擺洛塵轟飲俱忘無賴世
殘書尚逐不才身少游出處何稱善元亮門蹊未害貧

舍下薄田聽老僕芋魁栗子占來春

植杖柴門送野人紆迴沙岸淨無塵江因木落輸全面
月爲天寒剩本身浮白誰知平世恨苦吟惟判此生貧
殘梅一樹當扶護待破窮陰見早春

臘之廿八

悲歡動與歲時俱強記詩來填宿逋客趁社醺聞響屐
鄰分臘肉各喧厨雪晴遠岫方知數烟起踈籬可入圖
久矣同人多落落蕭條邱壑記余無

茶竈筆床剛取閒崢嶸風雪抗柴關苦辛世味黃連上
點染天機素萼間江迫數村依似泛雲迷一鴈去如還

西窓政好吟詩處收管斜陽若箇山

終然懶惰似初稀且待梅花墨灑衣臘後杯盤雜黍在
社中甲乙牧漁歸殘生較死無多少好事輸人豈是非
京口渺然書不到情知風雪與心違

癡坐還如飽此時森羅往事入追思悲多歡少盃中酒
雪落風淒卷裏詩博塞夜遊何限燭梅花歲計有餘枝
與君潦倒猶堪說來日雖多我不知

翌日卽除夕

剎那流光始覺賒村人爆竹夜俱譁障邊山喜曾遊徑
卧內梅疑欲作霞歌哭雖殊同此夕壺觴不約競鄰家

疲驢寒極思經歷半是峯顛半水涯

叉路縈迴林木賒漸聞村落賽神譁竹陰着地明還雪
酒候憑爐煖卽霞櫪馬喧仍工部夜壁燈寒似蜀州家
何堪守此無聊歲鷄唱更如天一涯

卽見屠蘇取後傳今宵雙鬢欲皤然山家無漏鷄堪信
洞客不吟梅肯憐黯黯孤懷支枕上茫茫萬事集燈前
穉兒衣帶摺痕細一例隨人媿拜季

詩成不遣外人傳似嚙如能得偶然梅落老槎歸遠斥
林寒宿鵲被空憐海潮自到柴荆外松火猶明并臼前
定識漁樵無得失已將今歲證來季

對雨二絕

披盡床頭卷淋浪竟日間未教鳧鴈睡池面起圓文
蕭條教燭暈浙瀝任松吹茅屋如蓬底翻思水宿時

獨立

輕盈月色倚門時斷麓虛江攬可知蟾冷魚龍還併窟
桂踈松竹更連枝玲瓏萬象誰非悟悽惻平生始欲悲
來夜清輝應滿滿情人慎勿誤幽期

元村醉席與諸人作

伯玉真知當五十桃花浪語發三千揮盃欲駐無情日
滯谷應回有眼天賢弟偏能親杖履窮人只是供詩篇

公家儼作靈光殿往事殷勤話共連

清潭與洪令遲稼

樂任

兄弟同遊

山靈不喝近澄潭槐影依然相府叅富貴已徵溪石萬
文章俱現華峯三白衣相失浮雲壑碧屨先登老蘚巖
祇恨淵翁不見我晚來寂寂落花揆

行知急澗慢爲潭休笑分身曲曲叅得酒此樓當歲萬
如花我輩應春三靈能發畫痴看壁情或成頑恐化巖
不着景中烟火語曾携桃峽丈人揆

花影難欺徹底潭皺顏應異去季叅不勝清境衣斤七
己破幽蹊屨網三閒若持盃心絕巘聲如出瓮語空巖

山游汗漫休嘲我我得惺惺佛界揆

桃花僂喚桃花潭如是花花悟境叅應接他峯身幻百
淡濃此酒德還三勤畱樊客牽情鳥親見淵翁皺面巖
盡用春風無不可綠陰傳語後人揆

漾月樓春會

未來光景幾登亭衰髮東風不許青芳樹四圍流水出
幽禽一散好花零仙丹已誤空煩訣春酒多狂欲毀經
彈送疏絃空外響痴人祇向指頭聽

重來花落滿柴門春酒俱空舌獨存俗病只堪遊竹所
塵緣未可覓桃源詩如狂蕊寧知種愁與遊絲不見根

消盡爐烟香欲動欲言今我頓忘言

又拈放翁韻

此間吟弄歲華多光景方來定若何自致青雲應善舞
誰將白雪尚高歌有情舊燕千迴雨無力窮鱗一轉波
較看是心丹一粒玲瓏着處不曾磨

不禁白髮鏡中多情極浮生喚奈何行處清狂都使酒
窮來痛哭變爲歌靈光欲盡傳他燭駭浪纜平起後波
嚙斷枯藤憎二鼠季華頓覺半銷磨

秋遊十步一芳多滿地荷花客謂何觸境因緣畱作夢
平生懊惱散成歌藏書屈戌渾爲蘚聽句陬隅或出波

誤指雲屏當暑飲近人青嶂兩肩磨

塵事蠶絲孰許多有涯生未寘無何窮雖忘世猶觀局
老不如人是唱歌已遺樵書從海嶽誰能餉酒似雲波
自憐文字偏奇怪儘受中年大折磨

又拈

曾向如來如是聞生如泡露幻如雲拔毛衰處稀遺種
握臂痾餘減半分酒斷宿香憐雨蝶吟開行響笑秋蚊
天生慧業磨難盡共隱壺中夏用文

不能清暑苦蟬聞東墅相過足片雲林氣收回秋一變
雨聲除却瀑三分魯連何黠猶稱鶴惠子多能亦比蛟

終古高人還積謫未堪煩作解嘲文

學佛定妨多所聞祇堪蕭灑卧閒雲空山答響誰還在
流水傳神我已分英氣低垂惟討蚤小言零碎更題蚊
妻言友道俱私謚生喜奇文死合文

夜拈

濯足清泉一事無今宵有月不爲孤盡看兒戲猶支枕
欲做仙遊可入壺偶坐依依松共駐狂吟遠遠鳥相呼
明將持被東齋去囑我巨然之幅圖

苦熱

高哦無賴古松存清想只要亂瀑喧荷欲紅燒應急性

蟬將禪學不多言斂眠索水簷鈴動靜坐候風床卷翻
薄暮攻蚊知下策更愁烟火滿西軒

瓶蓮

並序

蓮之奇品生於玉井蓮之奇觀在於西湖非玉
井西湖不足以盡蓮之奇矣夫土瓶之用或貯
酒或貯醋或貯醬而今十丈之華折而矮之十
里之香強而拗之納于瓶裏此固蓮之厄而臭
不移于醋色不染于醬氣不淫于酒此又蓮之
妙而若以一尺瓶謂非玉井以數升水謂非西
湖則是豈知蓮者哉今瓶蓮詩無酸味無甜味

無鹹味但有香味苟非主人翁父子文章之妙
何能發之然余詩或帶一滴酸味恐累全體之

香戊申初秋書

雲華降號是昭容湯沐移將白水封火浣輕裳滄色甚
少季豪侈老還慵

巧笑持來恃晚風如逢玉井綠波中信知佛性無寬狹
着處天然一樣紅

粟紋生冷影成雙月滿空欄露滿窓照得冰心明作鏡
爲翻新曲解嘲紅

除來滓穢綠還肥一朵玲瓏八夜輝重建此中甘露社

淵明判不攢眉歸

夢中浩蕩化爲魚一抹彤霞氣所噓百折不回君子德
中郎小吏未曾書

丹候差遲換骨癯珊瑚出網影相扶方壺下視蓬瀛淺
真本仙人寶蓋圖

仙舟纜放一泓回佛坐分從特地開大陸相逢開口笑
已知關令幻形來

舜陶堯啜德爲倫七竅疏通即聖人媿殺邵翁空見性
已教根撥屬前塵

隨緣榮悴盡良能舉扇流芳墜粉承紅頰傳神何處畫

熒煌齊放九枝燈

芳質輕盈恻素秋可憐回笑作儂愁立來水國無乾土

幻起空中結綺樓

未教金屋下珠簾移用傳筒玉露添沾得醍醐無上味

丐人殘馥送纖纖

愁霖

已過三日雨泔泔滿西東星宿強知畢朝昏莫問風泉

根衝虎落山氣入鴻濛先甘後作苦穡事恐無功

瑞暉先睹快雲黑又千重鷄散隨漂麥鶴翻還避松瓦

溝器自滌澗道確誰春樹下科頭立未逢危坐容

階除已浩森偏有陸沈懣拄杖鳩猜一投鞋冕訝雙潛

蚊喜自得亢魃悔仍降懶把潘文讀還嫌文似江

苦熱

今世無寒土戊申三伏時炎官火傘大日御赭鞞遲葩

寂詩風動林遲酒雨施九遷松樹坐蟬亦未安枝

朱明真苦客不去孰能揮甚畏注紅酒少欣褰碧衣風

期憑鳥解冰語與蟲違稍可梧陰卧煩人白板扉

如坐炊甑裏臂酸搖扇催怪圖雲漢色靈穴水晶堆月

亦猜窺座風如巧避臺微涼翻入想荷葉度身裁

前生逃苦債火急化翁嗔言語全無味形骸還不親緣

塵解兩襪汗雨墊高巾行處翻休夏青松白石巡
吾將乾沒死妄想苦相淹毛孔瓊樓起掌中仙露沾清
風列自馭赤日陸應粘雪裏芭蕉葉右丞畫不嫌

喜涼

坐我涼風裏水壺無一間塵玉持還重扇紈拋已頑淡
雲全拖水踈雨半開山詩撥玲瓏窈秋來蕪語刪
溪月知吾意在堂仍滿堂蟬情從此薄燕語向誰長蘿
壑填茶量松門繞畫腸詩圓未九轉更欲問丹方
便見蕭蕭髮侵人不近情山川孤鳥過風雨一燈明細
唾翻珠散清詩刻玉成可堪他夜夢枕畔又蟲聲

仲秋到長川共賦

無容將黠可嘲痴重到芳華半歇時喚夢提壺渠不醉
號寒促織自無絲寫來嘻笑文應浩閱盡流離畫亦遲
純是一生秋氣得西風不畏鬢邊吹

眉頭奇氣略相同除是青霞即彩虹快諾侵來應石爛
清詩洗出尚蓮紅常遣夢魂交夜月即將尤悔對秋風
山家消遣空寥甚賴有奇書一百叢

剛占晴色淡雲飛自怪清遊似我稀獨有幽禽思喚起
豈無芳草愛當歸陰知酒德如鳴耳頽卧詩愁似委衣
畱與後來知我狀傳神溪水揭斜暉

歲暮樊川又會

布衣先識一壺冰半減行季錯道增鄰鬼文章降一杵
騎危富貴戲長繩月中藤瘦龍蛇出雪後梅明蛺蝶承
夏問芳醪幾時熟當場沈醉老猶能
所謂伊人玉與冰清宵伴讀燭花增禪工頓悟應翻案
詞律傷嚴每重繩雪陣團團掩喜逐月弦帖帖鳥驚承
英雄末路元多酒曾裏槎枒遣未能
中冷瘦肌姑射水梨紋鏡裏每看增任吟屢誤宜重勸
名酒多愆己痛繩皓雪平頭松叟在朱砂塗頤鶴兒承
月明好唱光明偈此夜倍思盧慧能

黑衛淡穿澗道冰重來霜髮幾莖增元央妙製頻添綠
傀儡空場已斷繩世態烟隨雲起滅天機梅與菊交承
樊川直接蓬瀛水好待春風一潮能

明月時時自往回松間懷抱板扉開詩成今舊多山雨
燭闕悲歡是劫灰欲放狂歌幽鳥怪未禁素髮老梅猜
不煩重著家僮約臘底沽春勸此盃

莽眇寒禽何處回遠烟收盡暝山開茶清待客鞋聲雪
飯凸如村椀色灰圓月當歸完壁好新梅臨發獻珠猜
同人酒後多風浪况復西流大 缺盃

即看道嶽了青回每憶蓮峯似半開睡局已輸償苦茗

談鋒不露畫寒灰爐烟掩翳屏圖幻簷雪熒煌卷字猜
已識梅香常撲鼻濃寒三日口膠盃

燈前殘卷歲之餘霜髮全如百事踈缺月光多猶自吐
枯梅香動果誰噓尚喜老年看獵鳥寧欺稚子問鄰猪
柴門認是嘉平近一力提壺雪未除

常畏危途身幾餘零星齒髮更憐踈雪融大塊寒應曝
風寂玄冥喻欲噓通意可知冀北馬虛名孰辨沂陽猪
清談不到當時事曉月須臾已半除

易盡清歡明月餘透寒肌理薄紗踈畫屏眼霧山先塞
菊枕頭風香更噓庭雪搏堆猜伏虎村醪撓濁訝過猪

百憂眉上何能數人盡除時我亦除

自樊社來長川復集

與我後先明月來纔過踈樹已溪隈依人還作寒言鶴
翫世同歸冷眼梅靈氣如丹壺裏放年華似雪鬢邊堆
天機不欲吟輕出隱在雙眉每被催

破盡芒鞋不憚來此心常在此山隈飲狂客欲呼明月
吟瘦妻應妬老梅惜死名香魂不散憐情孤燭淚多堆
每嫌林末昏鴉翅拍拍相將短景催

勞唱樵青犯黑來倦如豹吠短籬隈愁清未可妳呼卷
骨傲尚能兄事梅雪意圍燈孤碧暈酒痕點袖亂花堆

別畱盡解東林樂七尺枯藜去意催

愁絲颺颺雪邊來籠盡山前與水隈
遠客叅禪先悟竹
佳人入夢已猜梅悲歡臘尾盃全瀉
貴賤餽頭土共堆
見說東岡饒杞菊壞來清境吏租催

仲春會于 永祐園齋共賦各體詩

荷死情存不可過虛池猶是薄鋪羅
酒濃等乳城中別
菜細如毛澗外多吏面依稀還類鶯
童書靈活欲籠鵝
好官未識誰家做堪笑公移沒印窠

老去全除海氣豪罇前不作一言牢
微官豈復從他笑
窮士安能獨自高千古虛名皆兔角
一生慧識是鳧毛

直廬睡夢如漁舍錯認潮音松有濤

終日岸紗恰看山尋詩我亦不能閑
百回番次成文錦
一轉歸心付劍環未散齋香正月饗
尚沾衣露百官班
邇來少別無新語到處相逢傻好顏

少須布德望春陽可耐生心是衆芳
花煦白丁應挾纊
雪寒青帝未治裝蓄菹冬後知修菜
成藥山中辨禹糧
老去濁根猶未去名山人夢記難詳

梅退逾知事事虛此生瓠落竟何如
淋漓瀉瀑看轟飲
詰屈溪山解僻書請客閑談還襯切
哦詩公事太勤渠
蕭然去拜如來像涼界誰回火宅車

細澗踈松清可娛舊琴如友是
巾須魂追月裏同遊白
身焚書中久學朱好句多方誰
究竟枯基不着豈贏輸
煩君乞酒松江宅我祖曾傾此
老壺

雪後東簷鳥喜鳴輕寒春色尚
平平傳盃愁退方三舍
結帶詩圍己九嬰學士請人應
羹飯相公去國亦魚羹
傍觀從古商量別冷暖終知自
着枰

一遊山澤得歡咸心許澄池面
識杉窟態求魚仍及乘
宦情有蟹欲無監一春詩富都
成卷百里書多未達函
不是樊溪應晦谷百花發後試
輕衫

又拈多字

詩逋堆向我身過春困沉沉戀
被窩泥滑纔憑禽語屢
雨淋先驗蟻行多神遊易蕩從
寥廓夢事雖空亦揣摩
吾輩今春應縱浪濫觴己識發
源河

花鳥應嗔不我過堪教筆硯
眞行窩豈嫌窮谷青春薄
不厭情儂白髮多小榻解來誰
是禪大床空後我應摩
休言使酒終難近一曲何妨千
里河

一月一窩十二過取應極樂是
春窩朋遊無色黃金少
歌曲非時白雪多午夢團團碁
破壞吟喉癢癢酒搔摩
提起文章千古話看君舌底劇
懸河

春風盡意好經過老去吾將不
出窩虛阱可堪蒙錦遍

靈機終是隔紗多
文何奇巧玉人琢
仙亦悲涼銅狄摩
借問吾生終底似
一沙流轉大恆河

閱盡風波百遍過
到今頑石作彈窩
虛窓夜氣工夫細
小酌春風罪過多
候月君應寒足累
評花我亦老瞳摩
文章自是關時運
隻手將看障決河

各賦五律

歸心無着處
姑與飲清宵
峯月何從缺
松風孰使搖
醉言同鶩咳
詩瘦作蜂腰
枯枕還驚夢
不知春水遙
昔來荷泛水
今到月開宵
行把梅枝嫩
坐隨松葉搖
官醪佐縮項
僧飯貸長腰
烟颺靈心去
依依近却遙

酒事皆由我
長壺住短宵
暮聲星欲落
畫影燭先搖
白髮方垂領
丹經尚在腰
天遊無大小
何處不逍遙
衆生方熟睡
二客有今宵
明月誰能狎
高松不可搖
村醪爭馬勃
齋軸較牛腰
世事何時定
低頭意自遙
齋冷常如雪
溪明不肯宵
眠痕穿混沌
酒力上扶搖
風珮鳴山骨
雲衣掩樹腰
詩魂何處到
千里不曾遙

又賦

屐爲循池理
簾從納嶂開
花心寒地忍
詩事大天來
小吏輕三語
微官戀一盃
欲歸還復坐
溪水作喧催
以簡齋春生
殘雪外酒盡
落梅前分韻
共賦

古人皆已死只留文字看紅者是珊瑚青者是琅玕五色睨之久熒煌眼欲酸生時飯糲空沾人口裏殘園中多花樹梅花慎莫折不惜蕊若珠令人傷離別奇影覆酒缸清香消酒渴不須閑商量我頭如梅雪嚏鼻只要瓜灸額只要艾敬器兩不堪適與好時會青山不脩飾明月無中外正看異側看觀詩如觀貝白髮何太奇復飲齋中酒明月知我心花枝入我手詩成不須寫形骸不復有身紗問何物塵中走卯酉饑飈宮吾脰長爪爬不忍吐詩滿虛空春天碧不盡佛亦不必排儒亦不必引此意大無當人怪我亦晒

澗石多磊磊高士多落落白眼不遭歡白髮不侵諾人生多離合過前如輕籜敢向東齋宿飯酒笑歌樂日月不可駐一瀉掌中盃功名不可久一霎盆中梅看梅眼苦寒把盃心苦哀潛然觀我心無去亦無來

共尋清涼寺用常建詩曲徑通幽處禪房花木深

爲分賦

羣遊不擇松孤刹先倚谷春日住我杖春風牽我足世緣如溪水欲斷還復續山鳥皆相怪狂歌又一曲白衲不迎客何心更擊磬汝慧金爲口我聾石不聽無帶不可施無衣不可贈萬法圓通象指示松間逕

我性好漱濯空門流水通炊飯借僧鐺須臾滿其中吾
聞西國米炊多色更紅見佛莊嚴相始欲問苦空
休松思臨水臨水思松休靈性跳不定水虛松更幽常
見東土人至樂西方求使渠生西方更願東土遊
泥佛在上方真佛在何許松樹漠不知巖石老無語我
心卽是佛不拜泥佛處殘僧乞一盃我飲不醉汝
喜觀名山記遠遊當十年偃松九里間怪石太湖邊楚
楚小伽藍何足久留連堪作如是觀聞諸黃面禪
昨日看佛書今日見道場空香何處至回聞流水長前
身疑是澤今生悟是房誰壓蔬笋味塵債未盡償

佛前多挿香日日會無遮爲惡佛嗔呵爲善佛咨嗟不
容私一髮緇徒漫虛誇今我空手來家貧無紙花
我其爲大瓶終日酒盈腹幸免琉璃破巖厓屢跌撲罵
佛佛還笑金剛先努目不足安尊拳我形拚土木
春詩無邊際春盃無淺淡烏帽寫蒼壁布襪坐青林後
當畫此遊添一拊杪禽曾有如此客歌笑登期岑

次放翁韻

東君老手已翻風未試林端着小紅定想經營非一日
團花栽葉費奇功

次石湖六言韻

蠶生種桑抽葉蜂出筒花吐香不須預度生計只堪對坐齋房

二月花時恰好過是熟曾是寒狂歌不必終曲戲着何須滿盤

共讀楊誠齋詩戲題十絕

東坡錯著水山谷多動風此志無上味未知同不同
癡人難說夢此詩謂病風須把唐詩看一字將無同
鮑昭真嫡派李白大宗風陶鑄黃金面花溪恐不同
多讀還多作筆下多變風他人有正聲與此迥不同
千里不畏人言是萬里風叅看石湖卷三十里不同

易傳皆寶翫聽詩馬耳風此詩靈妙理三易元不同
主客閒無事卧閱東齋風奇中同擊節還與誠齋同
不得詩要領始立先生風向來誦己背今看無一同
洋洋墨如海陣陣筆如風同墨不同筆我何不能同
俗詩常如霧掃之以大風欲學誠齋詩還與偈語同

古木聯句

庭前有古木熙枝勢尚盤挈虛腹多容蟻緯靈根欲化
蛇未消春後雪熙猶住夕餘霞苔幻全身葉緯雲分半
體花老容猶偃蹇熙奇狀更橫斜溜雨疑戾柏緯漂星
訝使槎青黃渠豈願熙繩墨自難加全力堪支厦緯緘

陰尚滿家天年能不闕熙文理復無邪匠石何能用緯
封來久識嘉熙

芳草聯句

雨餘芳草色隨處好芊芊緯嫩綠朝含靄淡青晚拖烟
迷應平岸外沾夏滿溪邊緯有是勾萌認無那野火
燃熙鞋光濃欲奪袍影漸相傳緯巧觀季倫障偏分子
敬氈熙針尖縫野合絲細繡蹊偏緯冶女魂先纈王孫
恨暗牽熙斜陽遲亦戀纖露浥還憐緯小院飄紅後菲
菲駐一季熙

殘雪聯句

東風初破暖殘雪欲成泥熙陰谷尋應遍陽坡望夏迷
平分荷一沼細辨麥千畦熙陳跡同銷印輕痕未刮
篋緯村牛無曉蹀野馬沒春蹄熙溪笑揩青發山皺鑷
白齋緯狂全稀吠犬陰己失蹲倪熙韻缺朝煎茗醒虛
夜折輦緯紅爐從點液素鬢更移棲熙勝似人情薄沾
滋秃筆題緯

怪石聯句

何季靈石老奇怪亦堪看緯精巧非人刻玲瓏若鬼刻
雲心生點綴山面假嶺岈緯地媪搏時結皇媯鍊後
團熙奇文猜豹隱靈狀訝龍蜿緯盡日霞長噴無時雨

未乾熙蘇憐供老佛米惱獻高官緯道侶餐非易奇人
拜不難熙謝名猶未改諸志亦同觀緯他日吳舟載依
然一片寒熙

橘盃聯句

我家無長物惟有橘皮盃熙却向懷中出仍從掌上擡
仙翁初化後巧匠細模來熙黃面疑金鑄素心驚玉
槌緯乍寬椰讓窄自馥竹添醅熙瓠欲浮江興瓢應掛
樹猜緯松瘦同德矣蕉葉下風哉熙香味從渠趣文章
豈是災緯春還竹林晚秋入洞庭催熙佳種得何處醉
鄉吾欲栽緯

硯滴聯句

滴來如漏水枯硯小丁東緯方有還無外如虛夏寶中
仙人呼吸近文士指揮同熙湯沐分毫賜磨礱助墨
工熙高才從海大靈竅與潮通緯汨汨資時澤沾沾潤
物功熙瀾翻生句藻漸漬作書叢緯吐納天機熟盈虧
地理公熙無欷殊器滿久建訝瓴空緯欲效涓埃報眞
誠挿化虹熙

催花聯句

爲底春風到太遲滿山芳卉杏花期熙重華共望桃眸
孔老草偏呼杏面皮緯紫泔千叢應後日紅蒸萬朶定

何時熙濃烟先動輕營苦細露頻沾造化奇緯燕自眼
瞠徒作怪蜂全賜行枉教癡熙將沾神筆丹青墨欲剪
靈機錦繡絲緯方解胚胎須地媪要還魂魄孰神醫熙
梅先發跡元英物礬欲呈身是妄兒緯香界盛衰從有
數化工操縱豈容私熙堪嗤槿帽催聲鼓造物專權在
此詩緯

待月聯句

遲遲圓月出東隅悄倚高樓望却孤緯踈抄依微濃靄
盡晴空點綴斷雲無熙欺遮真相山何剗偷徧靈光水
已鋪緯羞佛欲開旋閉眼奪龍將吐半吞珠熙宿禽漠

漠終非慧長谷沉沉更熙是愚緯虛白求呈先暗室分明
希指最冥塗熙頗驚露網能清導剛恨風輪尚緩驅緯
思覲耿光真僥倖願瞻明化少須臾熙蚌心易感垂寒
涕兔色應衰拂白鬚緯大落金霞初地影婆娑巾服政
堪圖熙

自東齋歸復拈

恰向春簷聽慧禽回憐老酒自溫斟清談細唾花生袖
山夢初醒碧滿衾雨裏來書應玉潤塵中散句許珠沉
平生易着輕輕屨只待芳菲是處淡
亦知相樂是林禽如水交情孰不斟山近清遊拋蠟屐

春寒奇事覆綿衾輕吟藝圃苗先握小酒愁城版不沉
庭樹半邊生色甚雪花先試百花淡

復會樊川見留三日聽秋對酌

曉月半規斜隱窓蓬鬆亂髮現成雙蝶迷忽忽翻如鳥
豹動殷殷錯是狔先見荷花占雨敗危心梧葉望秋降
聞性如今圓自悟何煩空外遠鍾撞
呼應俱無已靜窓覺來靈覺本非雙入翫窮技堪憐雀
趁塊狂心可叱狔豈以忘緣偷鉢得須教惡道豎幡降
怨思畢竟歸平等已厭交嗔慧劍撞

大家文物早排窓歷數前人不足雙轍去靈珠驚罔象

交揮瑞雪吠狂狔仙翻瀏亮堪偷唱武庫森嚴豈悔降
自笑雷門砰礧裏謾勞布鼓百桴撞

鎮日青山常在窓我來忙屢始成雙家貧盤訝擣毛鴨
客絕階疑輦足狔險句寧教奇鬼效牢愁難制老魔降
心行爲聽虛中樂一壑琮錚水石撞

己知一世不窺窓動業文章看作雙詩好惟甘拜蹇衛
勢尊誰敢呵狔狔三光不隕名難朽五嶽可移心豈降
好是樊川家數大小兒用手敢來撞

奇書拄屋劣開窓歷覽千季慧眼雙追及逸躡憐跛鰲
昨來枯骨笑饞狔窮途詩放柳州謫早歲文招牧老降

湖翁詩集 卷之二
豪氣輸君大床卧可容鼾息或交撞
悠然歸夢滿蓬窓快事柳陰魚惜雙久識身名驚璞鼠
卽看世態幻雲徂共拈小酌千流解自發孤吟萬籟降
得失相爭還一致胷前只遣鹿兒撞
澹清池色切朝窓痛飲無疑酒盞雙巾影屢捎初倚樹
屐聲先識舊迎狔秋從雨歇因輕襲山似樓高盡請降
險以牽彊留我久髮根白處幾胷撞
池上逍遙跡不踈挑來春酒幾瓢餘婆娑柳蔭玉絲鷺
撥刺蒲根金色魚是物俱乘涼雨快我吟祇管夕陽虛
高門樹德滋清福從上繁愁便破除

數來竹樹不吾踈從此清吟日計餘臂不能飛焉識鳥
尾猶可畏靜觀魚玉壺徹底孤心炯明鏡無臺萬象虛
安得香山叅會上他人塵慮未消除

漾綠池紋羅縠踈信情揮灑墨華餘久游公亦從文豹
遐舉吾將跨鯉魚莫遺痛心投瓦礫儘教洗髓入清虛
非仙非佛拈斯語聊向清林暑氣除

怪底天教我性踈人生百願儘無餘酒腸堪敵三升鼠
銅臭嫌猶一石魚宵爾霞箋光景薄冷然風袂往來虛
休言城底軟紅染湖氣如今尚不除

山家位置極清踈松外池塘綽綽餘林宅逢迎猶白鶴

莊生問答只游魚沙邊畫就孤彌勒鏡裏人行百子虛
上帝餉公清福厚山扉但恐下書除

閱世悲懽兩不踈有如白水涕痕餘晚來每覘過都鷓
暮遇猶爲縱壑魚但寘十壺須酒美莫安四壁作亭虛
大賞荷花過頭上浮生一快鬱煩除

萬本蓮花種莫踈堪知香國亦扶餘難移物性當奴橘
無盡生涯懷子魚波定靈心元不皺月浮閑話亦歸虛
歸來旁晚初醒酒柳浪松風滿石除

泖翁詩鈔卷之二終

